

編號 01 號

【戽水捉魚】郭亭好原作

阿宏哥一旦就係莊肚个搞頭王，不管係拈蛇打、戽水捉魚抑係起窯煨番薯、打鳥仔、灌土狗，麼个齣事佢都曉變，這兜細姪仔，做下當好跔等佢滿山滿坪滿哪仔操¹、滿哪仔寮。

有一年堵著做天旱，莊尾該條河壩水硬硬會燥忒咧，阿宏哥就湊兜共下去河壩戽水捉魚，大家聽著又有好搞个，暢到奈毋得，遽遽轉去屋下款傢伙，有个人拿錫桶、面盆，有个人拿瓠杓、撈仔，阿宏哥自家擎一支大砂撩²，歸陣細人仔就攞等傢伙磬磬鏘鏘³行對河壩去。

一到河壩，阿宏哥就用大砂撩耙出一條水路，同水旱走⁴開始攔水窟，水窟攔好咧大家就拿起面盆、瓠杓，同窟肚个水戽往出；阿明毋知挑事抑係毋堵好，一面盆个水戽啊出去，嘎戽著行對厝面前過个阿傑，害佢歸身潦潦連目珠都擘毋開，阿傑譴眇眇搭等拳頭嫲想愛過去搥⁵阿明，阿宏哥看著就遽遽行偈同阿傑揪

開，講阿明毋係挑事个，莫譴啦！過喊阿明同阿傑會失禮；阿明當有誠意頭那緊領緊會失禮，阿傑就無恁譴咧，應講：「好啦！無要緊啦！這下天時恁熱，恁樣也較涼啦！」就恁仔，大家又過嘻嘻嘩嘩歡喜戽水咧。

天頂个日頭恁箭日⁶，逐儕做下汗流脈落，等水戽燥該下看著緊奮緊跳个山鯪仔、石貼仔、白哥仔、石斑仔、蝦公這兜，大家做下暢若若仔⁷！阿旺較細，還毋識戽水捉魚過，這擺分佢看著有恁多魚仔、蝦公好捉，暢到緊喊緊跳，無堵好嘎去躡著有溜苔个石頭，跌到四腳惹天，連褲襠底都溼忒，原旦佢歡喜到吱吱滾這下嘎嗽到嘛嘛滾，大家看著也做下笑到吃吃滾⁸，喊佢愛較細義兜仔。

大家圍兼來七手八腳開始捉魚仔、拵蝦公。蝦公旦勢會囡在石頭下，兜就緊翻石頭緊捉；若還有戽毋躁个細水窟，就愛用撈仔去撈魚仔，毋過上游水又會緊洩⁹落來，大家緊捉魚仔又還愛緊戽水，就恁樣大家搞到歡喜轟天無想愛轉。

日頭會落山咧！阿宏哥喊大家同東西收擎，過同今晡日所有捉著个魚仔同蝦公平分分大家，有好搞又有好拿，逐儕都當暢，緊講天光日還愛過來。恁多年過去咧！到今還記得還細時个該條河壩，同共下戽水捉魚个細人伴仔。

¹ 操：音 cau；翻動。

² 砂撩：音 sa' liau'；圓鋤。

³ 磬磬鏘鏘：音 kin kin kiang kiang；狀聲詞，金石類撞擊聲。

⁴ 同水旱走：音 tung' sui' hon' zeu'；將水引走。

⁵ 搥：音 zem'；握緊拳頭揍人的樣子。

⁶ 箭日：音 jien ngid'；陽光直射的樣子。

⁷ 暢若若仔：音 tiong na na e'；很高興的樣子。

⁸ 吃吃滾：kid kid gun'；狀聲詞，笑聲。

⁹ 洩：xiab；液體或氣體排放、滲出。